

## **MAANDELIKSE NUUSBRIEF: JANUARIE 2018**

**Geagte HSAG-belegger / Mnr / Mev / Mej**

**Hierdie nuusbrief is aan u gerig as lid van die Hoëveld Sindikasie Aksiegroep (“HSAG”) op grond van u belegging in die Highveld Sindikasiemaatskappye 15-22 en/of u ondersteuning van die HSAG.**

**Alhoewel e-posse van tyd tot tyd uitgestuur word is die [www.hsaction.co.za](http://www.hsaction.co.za) webtuiste die primêre plek waar u HSAG inligting kan bekom.**

**Hou ons asseblief op hoogte van enige veranderinge van u persoonlike en/of kontakbesonderhede.**

**In hierdie nuusbrief verwelkom die HSAG die beleggers, en bied ons ‘n neutedop opsomming ten aansien van die huidige stand van sake. Ons verskaf die nuutste verwikkelinge ten aansien van die inwerkingstelling van die debietorder fasiliteite, en reageer die HSAG ook op die HSBF se skrywe gedateer 11 Januarie 2018.**

### **1. VERWELKOMING EN INLEIDING: 2018**

Ons wens elke lid en belegger ‘n voorspoedige 2018 toe, en is die regsspan van die HSAG tans besig om skouer aan die wiel te sit ten aansien van Georgiou en andere se poging om na die Hoogste Hof van Appèl (die ‘HHA’) te appelleer teen bevel in die guns van die HSAG.

2018 belooft om ‘n goeie jaar in die algemeen te wees en is die winde van verandering besig om positief IN Suid-Afrika te draai in die rigting van reg en geregtigheid. Die regering is tans besig om ongeregtigheid en korrupsie vas te vat en glo die HSAG dat dit ook tot voordeel vir die beleggers sal wees. Verskeie kriminele klagtes is jare gelede reeds gelê en is die aanduidings positief vir 2018.

Die bestaansreg van die HSAG is daarin gesetel dat ‘n groot groep van HS beleggers saamstaan om hul bestaande regte af te dwing in ‘n geregshof teenoor respondente wie verantwoordelik gehou word vir miljarde rande se skades en verliese wat die beleggers gely het. Indien beleggers nuwe skikkings ooreenkomste met die teenkant onderteken, verval daardie regte wat hul tans uit hoofde van die HSAG besit, en loop hulle die gevaar om alles in die proses te verloor.

Georgiou/Orthotouch se prokureurs het onlangs aangedui dat die bundels vir die HHA nou eers byna gefinaliseer is, waarna die hulle die HHA wil kontak ten einde ‘n datum vas te stel vir die aanhoor van die petisie. Die HSAG sal egter sy lede se regte streng voorbehou indien die teenkant nie by die Hofreëls hou nie.

## **2. DEBIETORDERFASILITEIT**

Die HSAG bestuur het aan die einde van 2017, op grond van verskeie versoeke deur agterstallige lede wat nie eenmalige jaarlikse bydrae kon maak nie, die moontlikheid van 'n debietorderstelsel ondersoek en is daardie fasiliteite nou gefinaliseer. Die tersaaklike agterstallige beleggers sal gedurende Februarie 2018 dokumentasie en inligting ten aansien van hierdie debietorderfasiliteit ontvang.

Indien u (1) agterstallig is en (2) belangstel om 'n maandelikse debietorder te verskaf, moet u asseblief so spoedig moontlik u volle naam, van en identiteitsnommer stuur aan [hsagdebitorder@gmail.com](mailto:hsagdebitorder@gmail.com). Na ontvangs van laasgenoemde e-pos, sal die HSAG dokumentasie aan u stuur wat u sorgvuldig moet invul en terugstuur per kerende e-pos, ten einde die HSAG in staat te stel om u debietorderfasiliteit te aktiveer.

## **3. HSAG SE AMPTELIKE WHATSAPP-GROEPE**

Die HSAG herinner beleggers wat steeds wil aansluit by die HSAG se amptelike Whatsapp-groepe, om gerus hul selfoonnommer; identiteitsnommer; volle naam en van, na [hsactiongroup@gmail.com](mailto:hsactiongroup@gmail.com) stuur. Die HSAG het ook 'n facebook-blad, en kan by [www.facebook.com/hsaction](http://www.facebook.com/hsaction) besigtig word. U kan ook direk kontak maak met die onderskeie Whatsapp groepe by 079 635 4165 (Afrikaans) en 082 450 8854 (Engels).

## **4. HSBF SKIKKING EN ONLANGSE KORRESPONDENSIE**

Dit het onder die HSAG se aandag gekom dat Mnr Nic Georgiou se HSBF wat gedryf word deur Mnr Helgard Hancke, weer pogings aangewend het om beleggers te oortuig dat hulle (nieteenstaande verskeie vorige teleurstellings) weer met Mnr Nic Georgiou/Orthotouch besigheid moet doen.

Eerstens sal die HSAG sy lede waarsku om geensins met Orthotouch besigheid te doen nie omdat Orthotouch reeds ernstige finansiële probleme in die gesig staar en in ieder geval onder 'n finansiële Artikel 155 Reëlinskema verkeer. Gemelde skema is bestem vir maatskappye wat nie hul verpligtinge teenoor krediteure kan nakom nie.

Mnr Nic Georgiou is die welgestelde persoon wat met die beleggers se geld sit en, indien lede met Orthotouch skik, bepaal daardie kontrak dat Mnr Nic Georgiou, sy familie en sakeryk algeheel kwytgeskeld word van enige verpligtinge. Die HSAG tree persoonlik teen Mnr Georgiou, sy familie en sakeryk op en is die inligting tot ons beskikking dat hy steeds die beleggers se miljarde rande beheer. Dit kan gevolglik ramspoedige finansiële gevolge vir beleggers hê indien hulle hul regte teen die Georgiou en ander respondente afteken.

Mnr. Helgard Hankce maak reeds, sedert hy op 'n onderduimse wyse na die Georgiou kamp oorgestap het op 'n stadium toe hy in 'n vertrouensverhouding met die HSAG en bestuur gestaan het, leë beloftes dat beleggers se regte "beskerm" is en dat hulle sedert

April 2017 reeds hul geld sou kry. Hiervan het egter dadels gekom en word die sperdatums en beloofde uitbetalings voortdurend aangeskuif met flou verskonings.

Die HSBF skikking met mnr Nic Georgiou/Orthotouch hou enorme gevare met rampspoedige gevolge vir beleggers in. Daar is geen waarborg betalings uiteindelik sal realiseer nie en is die kans dat beleggers die ooreengekome bedrae sal ontvang, feitlik nul. Intendeel, ons word meegedeel dat persone wat aan die begin van 2017 met Mnr Georgiou deur middel van Hancke vir 50% skik het, buiten een betaling, niks verder ontvang het!

Die HSAG is geensins gekant teen enige skikking met mnr. Nic Georgiou / Orthotouch nie, maar sal dit **net** doen as die belange van die HSAG-lede beskerm word. Slegs indien voorsiening gemaak word vir die moontlikheid dat, sou Georgiou/Orthotouch nie hul woord hou of aan die ooreenkoms voldoen nie, beleggers kan voortgaan as lede van die HSAG klas-aksie. Dit is tans nie die geval met die skikking deur Hancke (HSBF) namens mnr Nic Georgiou/Orthotouch nie, aangesien die beleggers **beslis** hul regte in gevaar gestel het deur die ondertekening van die huidige kontrak.

Die Georgiou propaganda masjien, die HSBF, poog om beleggers te oortuig dat die hofgedinge “duur en vrugtelose litigasie” is. Duidelik verstaan die propagandiste nie die beginsel van “ekonomie van skale” nie. Byvoorbeeld, Mnr Hancke moes in een saak wat hy verloor het, 33 keer meer aan die HSAG betaal as wat ‘n HSAG lid jaarliks moet bydrae!

Die enigste oogmerk daarvan is om beleggers daarvan te laat afsien om hul geld vanaf Mnr Georgiou en ander respondente terug te eis. Die vraag is: “Waarom sal HSAG lede toelaat dat iemand met hul hardverdiende geld wegstap?”. Mnr Helgard Hancke het in onlangse hofstukke bewys dat hy nie sal skroom om onder eed onwaarhede kwyt te raak nie en kan hy beslis nie vertrou word nie. Hy het immers, terwyl hy op die HSAG bestuur gesit het, in die geheim met Mnr Georgiou onderhandel, geskik en die HSAG verraai.

Die enigste persone wat die litigasieproses wil vertraag is Mnr Georgiou en sy trawante. Waarom spandeer hulle die beleggers se miljoene rande op litigasie? Die oplossing vir Georgiou is eenvoudig: **Stel jou saak aan die Hof en verduidelik wat van die beleggers se miljarde rande geword het!** Tot dusvêr het hulle egter alles in die stryd gewerp ten einde die klas-aksie te ontspoor, en voormelde is herhaardelik deur die Regters van die Hooggeregshof, Spilg, Murphy en Ismail in hul sterkbewoorde uitsprake uitgewys. Laasgenoemde uitsprake spreek vansself, en is die HSBF se opmerkings sonder enige subtansie, en sonder enige konkrete bewyse wat hul verskeie opmerkings en bewerings kan staaf. Voormelde uitsprake asook die eedsverklarings waarin Mnr Hancke ontmasker was dat hy leuens onder eed vertel het, is beskikbaar vir besigtiging op die HSAG se webtuiste by [www.hsaction.co.za](http://www.hsaction.co.za).

Ten aansien van die HSBF se skikkingsterme, is daar definitiewe gevare waarvoor die beleggers bedagsaam moet wees:

- Beleggers wat die HSBF se voorgestelde skikking aanvaar, erken die bestaan en regsgevolge van die A155 Reëlinskema, welke skema die HSAG in die proses is om tersyde te stel. Beleggers se aanbod om te skik is onomkeerbaar, en kan dus nie na ondertekening deur 'n belegger teruggetrek word nie.
- 'n Verdere risiko is dat beleggers onmiddelik hul eise verloor by ondertekening van die skikkingsooreenkoms, omrede Orthotouch onmiddellik sessie neem van beleggers se aandele. Dit beteken dat, indien Orthotouch versuim om die volle 55% kapitaal te betaal in terme van die skikkingsooreenkoms, sal 'n belegger nie op sy regte kan steun nie, omdat voormelde reeds aan Orthotouch sedeer is.
- Dit beteken dat sulke beleggers nie sal kan steun op die ondersteuning van die HSAG indien die ondertekende skikkingsooreenkoms nie nagekom word nie.
- Beleggers sal ook geen verdere rente ontvang nie, selfs al minag Orthotouch die skikkingsooreenkoms.
- Voorts moet beleggers in gedagte hou dat die HSBF reeds vir 'n geruime tyd dreig dat Orthotouch gaan likwiedeer, maar terselfdetyd word 'n skikking met Orthotouch promoveer! Laasgenoemde laat ernstige en kommerwekkende vrae ontstaan, asook die feit dat verskeie beleggers selfs nie meer rentebetaling in terme van Opsie 1 ontvang nie.
- Die HSBF beweer in hul skrywe dat beleggers aangetoon het dat hulle nie wil wag tot November 2024 ten einde hul pro-rata kapitaal te ontvang in terme van Opsie 1 nie – laasgenoemde stelling is misleidend, omdat dit algemene kennis is dat Orthotouch struikel om rentebetaling tydig na te kom, en dat die volle uitbetaling in 2024 algeheel onwaarskynlik is.
- Orthotouch het tot datum hiervan steeds nie Opsie 2 se beloofde uitbetaling in Maart 2017 gestand gedoen nie, en dit ten spyte van 'n hofbevel wat gehoorsaam moet word in hierdie verband.
- Dit blyk ironies te wees dat die HSBF as een van hul “aspekte wat die betalingstermyn beïnvloed” die rentebetaling aan beleggers wat *nie* geskik het *nie*, oorweeg. Selfs voordat die skikkingaanbod deur die HSBF fasiliteer is, was daar reeds beleggers wat nie hul maandelikse rente ontvang het nie – 'n struikelblok wat Orthotouch tot datum hiervan nie bevrededigend kon aanspreek nie.

Watter impak sal die beloofde betaling in terme van die 55% skikkingaanbod op beleggers hê wat verkies om *nie* te skik *nie*, en waarom moet laasgenoemde beleggers enigsins beïnvloed word deur 'n moontlike skikking? In terme van die A155 Reëlinskema is Orthotouch in elk geval verplig om rente aan die beleggers te betaal, en behoort hierdie aspek dus geensins deur Orthotouch oorweeg te word ten einde beleggers te oortuig om te skik nie! Hulle is immers gebonde aan hul eie hofbevel wat hulle agteraf en in die geheim verkry het en kan hulle nie nou daaruit kom nie!

Waarom beklemtoon Helgard Hancke kontantvloei as Mnr Georgiou reeds met ál die kapitaal van die beleggers sit? Waarheen het die geld gevloei en hoekom vloei slegs druppels rente terug? Dis hoogtyd dat Orthotouch en Mnr Georgiou hulle boeke oopgooi en wys wat het van die beleggers se geld geword! Een ding wat Hancke nooit aan beleggers sal kan verduidelik nie is: Wat het geword van die miljarde rande wat Georgiou gevat het?

Dit blyk duidelik dat Orthotouch inderdaad bekommerd moet wees oor hul “gesonde kontantvloei”, soos daar beweer word “oor en oor” beklemtoon is ten einde die HSBF se skikking suksesvol uit te voer.

Beleggers moet hulself derhalwe die belangrike vraag vra: Beskik Orthotouch enigsins oor die vermoë om die skikkingsooreenkomste na te kom, aangesien dit blyk asof Orthotouch straks nie oor die finansiële vermoë beskik om hul verpligtinge in terme van die Reëlinskema na te kom nie.

Die HSAG-lede word derhalwe weereens ernstig gewaarsku om baie versigtig te wees (en selfs regsadvies van hul eie prokureurs te verkry) wanneer hulle sake doen om met Nic Georgiou / Orthotouch buite die HSAG te onderhandel, aangesien dit nadelig vir hul regte kan wees en uiters riskant is.

Die Valke was onlangs weer in verbinding met die HSAG en bevestig dat hul ondersoek voortgaan. Dit blyk duidelik asof daar persone is wat onrustig moet slaap en antwoorde verskaf oor wat geword het van die vermiste miljarde.

## **5. LEDE-BYDRAES EN REGISTRASIEKOSTE**

Die lewensbloed van die HSAG is die reg op toegang tot die howe met regsverteenvoering plus die nominale jaarlikse bydraes wat lede en ondersteuners maak. Die HSAG se opponente, wie met miljarde rande van beleggers se hardverdiende sit, sal egter alles in hul vermoë doen om te keer dat ‘n geregshof ‘n beslissing oor die terugbetaling van die gelde maak. Tot dusver het die howe in al meer as 15 aansoeke (met uitsluiting van een saak) suksesvol op die meriete ten gunste van die HSAG beslis. Alle aanduidings is daar dat die beleggers ‘n verdienstelike saak ondersteun.

Dit is egter van uiterse belang dat HSAG-lede seker moet maak dat hul registrasie- en regskoste so spoedig as moontlik op datum gebring word, ten einde die HSAG-prokureurs en regsspan in staat te stel om die saak namens die beleggers te kan dryf. Die HSBF poog gereeld om mens te ontmoedig om enkele duisende rande by te dra tot die klas-aksie wat miljarde rande eis en verdermeer, dat die regsspan kwansuis slegs ingestel is om geld te maak. Die feit van die saak egter is dat die prokureurs so lank gelede as Maart 2015 ten volle vir dienste betaal is. Kan dieselfde van Hancke gesê word?

Lede word gevolglik versoek om voort te gaan om hul ondersteuning aan die HSAG, wat immers hul eie saak dien deur getrou hulle jaarlikse finansiële bydraes te lewer waardeur

die enorme verliese deur die beleggers gely, geëis word. Alhoewel dit 'n las plaas op die administrasie van die HSAG, kan die jaarlikse bydraes selfs in paaiemente betaal word. Vir lede wat agterstallig is met opvragings, is daar nou ook 'n debietorderstelsel in plek wat vanaf Februarie 2018 geaktiveer kan word.

Ons kan u die versekering gee dat daar uiters versigtig gewerk word met die ledebydraes wat ontvang word. Alle fondse met betrekking tot die HSAG word in 'n aparte trustrekening betaal vir onder andere regskoste, uitgawes en die administrasie van die HSAG, welke groep uit ongeveer 7 000 individue bestaan.

Hierdie rekening wat spesifiek vir dié doel deur die HSAG-prokureurs geopen is, word behoorlik geoudit deur onafhanklike ouditeure. Die HSAG-prokureurs hef slegs fooie en uitgawes soos en wanneer dit nodig is en dit nádat die werk reeds gedoen is.

Ons versoek u dus ernstig om 'n daadwerklike poging aan te wend om u lede-bydraes op datum te bring ten einde u saak vorentoe te neem.

## **6. 2018 HSAG-INLIGTINGSESSIES**

Gedurende Oktober 2017 het die HSAG-bestuur op versoek van HSAG-lede besluit om inligtingsessies as proeflopies in verskillende streke te hou ten einde vas te stel of daar 'n behoefte daarvoor bestaan en of dit prakties uitvoerbaar is.

Dit verdien om te meld dat die inligtingsessies heelwat tyd en onkoste verg. Na afloop van die 2017 inligtingsessies wat as toetslopies aangebied was, en weens die aansienlike belangstelling in die sessies en die bywoning daarvan, sal die HSAG-Bestuur 'n besluit neem om vas te stel wat die behoefte is vir die aanbied van verdere HSAG-inligtingsessies wat moontlik vir 2018 jaar geskeduleer sal word.

Die HSAG-bestuur sal die sukses van die inligtingsessies opweeg teen die kostes daarvan, en is voornemens om in Februarie 2018 se nuusbrief terugvoer te gee oor die moontlike inligtingsessies vir 2018. Die moontlikheid van addisionele finansiële ondersteuning deur die streke wat inligtingsessie verlang, is ongelukkig nie uitgesluit nie.

## **7. SURVEY MONKEY**

Die HSAG het in 2017 met kwartaalike meningsopnames onder lede begin wat 'n groot bydrae gelewer het om die lede se siening en behoeftes van die klas-aksie vas te stel deur die sogenaamde Survey Monkey op die HSAG webtuiste. 'n Nuwe stel Survey Monkey vrae sal in die eerste kwartaal (moontlik reeds in Februarie 2018) op ons webblad by [www.hsaction.co.za](http://www.hsaction.co.za) beskikbaar wees. Ons nooi u graag vriendelik uit om, indien u nog nie die huidige meningspeiling voltooi het nie, dit te doen en ook, sodra dit op die web is, die nuutste vraelys te voltooi.

## **8. KOSTE**

Vanuit die staanspoor is HSAG-lede in kennis gestel dat, afhangende van die ondersteuning en samewerking van voornemende HSAG-eisers, dit verwag kan word dat jaarlikse bydraes van die HSAG-lede aangevra sal moet word. Gelukkig besef die oorgrote meerderheid van lede dat die saak namens en ten behoeve van hulle gedryf word. Ongelukkig is daar 'n groot aantal lede wat nie kan of wil bydra tot die saak nie, want dan op sy beurt 'n verdere finansiële las op die ander lede en verál die regsspan plaas. Weens die beduidende aantal lede wat nie hul kant oor tyd gebring het nie, moes daar op 'n meer gereelde basis opvragings gedoen word maar gelukkig kon die koste-opvragings nominaal gehou word.

**Registrasie-, administrasie- en regs-koste is van tyd tot tyd betaalbaar en is nie terugbetaalbaar nie.**

**Die bestuur het besluit om die kostes vir 2018 weereens op R2 000 per persoon te hou, en sal die nuutste opvraging binne die volgende twee maande op u staat verskyn.**

## **9. DIE HUIDIGE STAND VAN SAKE**

Soos hierbo gemeld het die howe oorweldigend in die guns van die HSAG beslis.

Die oorgrote meerderheid lede besef dat Georgiou hulle letterlik met hul eie geld probeer beveg, maar het die wiel reeds aansienlik in hul guns gedraai. Buiten die feit dat die HSAG lede se eise nie verjaar het nie het die hoogste howe reeds kennis geneem van hul saak.

Die teenkant is só desperaat dat die sake nie teen hul voorgaan nie dat hulle 'n jaar gelede op 'n onbehoorlike en onetiese wyse die voorgenome klas-aksie probeer ontspoor het. Nie alleen was persone vir wie die HSAG in vertrouensverhoudings geplaas het, omgekoop nie maar was sommige voormalige ondersteuners van die HSAG gekorrupteer om die belange van die teenkant te bevorder en gewetenloos blatante leuens te versprei. Sommige individue het ten koste van beleggers se hardverdiende beleggings, astronomiese vergoeding ontvang. Die hoofogmerk van die HSAG se opponente is om verdeeldheid te saai en die groep te probeer stuit om by die hof uit te kom.

Soos voorheen vermeld, moet die die Hoogste Hof van Appèl te Bloemfontein in 2018 die belangrike regsvraag oorweeg of 'n Nominale Applikant (dus 'n belegger wat slegs 'n "plekhouer" is, en wie duisende ander beleggers verteenwoordig) in 'n klas-aksie uit eie beweging sodanige aansoek om 'n klas-aksie te sertifiseer, asook die aansoek om Orthotouch se Reëlinskema tersyde te stel, kan terugtrek.

Bovermelde regsvraag was nog nooit voorheen in die Suid-Afrikaanse reg oorweeg nie, en sal die HHA se beslissing daaromtrent geweldige verreikende gevolge vir klas-aksies in die toekoms inhou. Die voordeel van 'n HHA uitspraak sal egter wees om by 'n klas-aksie te verhoed dat 'n gewetenlose Respondent in 'n posisie kan wees om korrupte

Applikante om te koop om die saak terug te trek. Indien die HHA vasstaan agter Regters Ismail en Murphy van die Gautengse Hooggeregshofbeslissings, sal die HSAG onverpoosd kan voortgaan met met die aansoek om die Reëlinskema tersyde te stel en die aansoek om die klas-aksie te sertifiseer.

Soos reeds hierbo vermeld, indien die teenkant hoegenaamd vasberade is om voort te gaan met die appèl, ons tans in afwagting is vir 'n datum wat deur die HHA toegeken moet word vir die aanhoor van die petisies van Mnr Nic Georgiou en Orthotouch. Beleggers sal op hoogte gehou word van die vewikkelinge.

Beleggers moet asseblief ons webtuiste dophou ten aansien van die publisering van alle inligting en datums.

## **10. LAAT-AANSOEKE VIR REGISTRASIE BY DIE HSAG**

Laat-aansoeke sal op 'n streng *ad hoc* basis oorweeg word. Die registrasievorms is op die webtuiste by [www.hsaction.co.za](http://www.hsaction.co.za), beskikbaar of in die alternatief kan u 'n e-pos na [hsagregister@gmail.com](mailto:hsagregister@gmail.com) stuur om 'n registrasievorm te versoek. Alle versoeke en voltooide registrasievorms moet aan [hsagregister@gmail.com](mailto:hsagregister@gmail.com) gestuur word.

## **11. STAAT VIR DEELNAME AAN DIE HSAG**

Vind asseblief hiertoe aangeheg u bydraestaat vir u deelname aan die HSAG.

Let asseblief op die volgende:

1. Indien geen opvraging ten aansien van registrasie-, regs- of administrasiekoste of 'n krediet op u staat verskyn nie, beteken dit dat u waarskynlik in 'n groep val wat nie geprosesseer en / of geallokeer is nie, en sal dit, indien dit onder ons aandag kom of gebring word, op 'n latere staat verskyn:
2. Die aangevraagde opvraging vir 2016-regs-koste was R1 000 per sindikasie.
3. In Mei 2017 was 'n verdere opvraging vir bydrae tot regs- en administrasiekoste van R2 000 per persoon gemaak, en sal 'n soortgelyke trustopvraging vir 2018 van R2 000 per persoon sal op u staat verskyn binne die volgende twee maande.
4. 'n Eenmalige registrasiekoste van R1 000 per sindikasie was ook gehef en sal ook op u staat verskyn.
5. Indien 'n balansstaat 'n kredietbedrag toon, is u 'n geregistreerde lid van die HSAG, maar het ons nog nie u voltooide aansoekvorm ontvang nie. Geliewe die aansoekvorm af te laai vanaf ons webwerf, of rig 'n versoek aan ons daarvoor per e-pos by [hsagregister@gmail.com](mailto:hsagregister@gmail.com).
6. Let asseblief daarop dat die inligting op ons rekords aanvanklik verkry is vanaf aansoekvorms:
  - a. Indien u aansoekvorm gevolglik foutief, onduidelik of onvolledig is sal u moontlik geen state of e-posse ontvang nie.



- b. Voltooi asseblief die HSAG-vraelys op “Survey Monkey”, wat van tyd tot tyd op ons webtuiste geplaas word, ten einde u inligting op datum te bring, of stuur vir ons ’n e-pos na [hsagregister@gmail.com](mailto:hsagregister@gmail.com).
7. Klik asseblief op die e-pos skakel aan die einde van hierdie nuusbrief om na die “Customer Zone” te gaan waar u die opvragings vir registrasie-, reghskostes en u betalings kan sien.
  8. Weens die voortdurende groot hoeveelheid navrae, registrasies, wysigings van persoonlike besonderhede en allokasies, is dit moontlik dat sommige betalings en/of registrasies nie op die aangehegte Staat sal verskyn nie, maar eers op ’n latere Staat. Maak asseblief seker dat u inligting korrek is.
  9. Geoutomatiseerde state sal van tyd tot tyd (gewoonlik maandeliks) uitgestuur word, maar u skakel na die “Customer Zone” sal deurentyd aktief bly en u kan ter enige tyd u betalings en transaksies daarop sien, soos wat dit geallokeer word.
  10. Indien daar enige uitstaande bedrae is, word u vriendelik versoek om dit so spoedig moontlik te betaal ten einde onnodige administrasie en/of verdere kostes te verhoed. Sodanige lede wie se registrasiekostes steeds agterstallig is, loop die gevaar dat hul lidmaatskap by die HSAG opgeskort gaan word.
  11. Registrasieheffings is betaalbaar op alle nuwe en agterstallige (90 dae en ouer) registrasies. Registrasiekoste beloop tans R1 500,00 per sindikasie en, indien latere registrasies toegelaat word, sal daar waarskynlik ’n verdere heffing vir registrasiekoste per sindikasie vir alle nuwe registrasies gehef word ten einde finansiële bydraes deur huidige HSAG-lede te verlig.
  12. Deelname aan die HSAG is algeheel vrywillig, maar sal persone wat nie aan die HSAG behoort of hul versoekte bydrae op datum hou nie, nie aanspraak kan maak op enige regte of voorregte wat getroue lede van die HSAG geniet nie. Persone wat hardvogtig weier of versuim om ledebydraes te maak se lidmaatskap sal beëindig word.
  13. Ons bedank u vir u lojale ondersteuning, waarsonder die HSAG Klas-aksie nie moontlik sou wees nie.
  14. U kan verseker staatmaak op die onverdeelde en lojale ondersteuning van die HSAG-lede en geassosieerdes.
  15. Enige spesifieke navrae kan aan [hsagenquiries@gmail.com](mailto:hsagenquiries@gmail.com) gerig word.

**Vriendelike groete**

**HSAG-Bestuurskomitee**

Kontak die HSAG en prokureurs by:

Tel: (021) 887 7877

**[hsactiongroup@gmail.com](mailto:hsactiongroup@gmail.com)**